



圖書

齊乘  
明刊  
六本

校刻齊乘序



于思容氏齊乘凡六卷曰沿革曰  
郡邑曰古蹟曰亭館曰土俗曰人  
物繫全齊者蓋暇備矣青州故  
齊都也二百年来顧獨無志歲在  
甲子蒐羅圖籍期勒成編而乘出  
敝篋中郡志之作大都本此余竊

思唐世板史儘于兵燹劉煦徒修  
遂成一代之典歐宋更之編猶新  
史而煦史意廢論者謂新舊二史  
互有得失煦史也善事詞稍備  
歐宋簡潔刻削甚矣至於驪山  
密相問答禹偁中興神采炳若  
丹青較之歐宋似或勝之而乃并

此廢焉是可惜也况史官氏採輯  
參定上下數千餘年雜合同異各  
有義無其尤得者黜齊如退少  
翁表轅郟辨王貢黃師範罪張  
賓訂九河之未沒遠道系沈謂  
佛說之乘虛獨宗孟氏雖其紛  
如孟陽去取稍深營丘得陵奪

合彙造眩余嘗謂其志山水如景  
純述人物如詩為志也世之史記  
余固不忍以世之廢照者廢棄也  
嘉靖甲子仲冬長至

賜進士第中憲大夫青州府知府

四明杜思子壽撰



丙辰  
進士

### 齊乘序

齊乘六卷故兵部侍郎于公志齊之山  
川風土郡邑城郭亭館丘壠人物而作  
也古者郡各有志中土多兵難書弗克  
行我 國家大德初始從集賢待制趙  
抃之請作大一統志蓋欲盡述天下都  
邑之盛書成藏之祕府世莫得而見焉  
予公生于齊官于齊考訂古今質以見

三歲久始克成編辭約而事核公在  
中朝爲御史憲臺都事左司員外郎終  
蓋都田賦總管以文雅擅名當時旣卒  
其家蕭然獨遺是書于其子潛余官維  
揚始得閱之嗚呼齊地之疆民物之夥  
自古然也桓公任管仲以成霸業聖人  
嘗稱其功謂一變能至於魯後世去古  
雖遠山川郡邑猶存革其俗以化其民

獨不在夫上之人乎當漢之始兵戈甫  
定曹參爲齊相師禮蓋公以清靜化民  
齊乃大治茲非其效歟今齊爲山東重  
鎮所統郡縣五十有九宦游于齊者獲  
是書觀之寧無益乎予於于公之言重  
有感焉謂三代兩漢人材本乎學校之  
教養謂風俗自漢晉以降愈變而愈下  
美昔人之賑饑有道歎近世之採金病

民以稷下學術流于異端以海上求仙  
惑于神異斯亦足以慨公之志矣夫公  
諱欽字思容益都人潛擢南行臺掾云  
至元五年己卯冬十月丙戌朔嘉議大  
夫江北淮東道肅政廉訪使蘇天爵序

趙爵  
蘇氏

齊乘卷之一

郡人于欽思容纂

沿革

帝嚳九州之制青州初履海岱禹貢  
九州曰海岱惟青州謂東北跨海西  
南距岱少陽之方其色為青故以名  
也舜肇十二州以青越海析遼東為  
營商制九有以青為徐周官職方以

徐爲青其東北爲幽州齊則囊括青  
州襟帶徐兗幽營非所兼也古之國  
于此者少昊之世有爽鳩氏虞夏有  
季荊商有逢公栢陵薄姑氏皆爲諸  
侯周武王克商封太公呂尚于齊未  
得薄姑之地成王時薄姑與四國作  
亂成王滅之益封太公遂有全齊漢  
志曰齊所以爲齊以天齊也蓋臨淄

有天齊淵以此建國命名耳管仲曰  
昔召康公命我先君太公曰五侯九  
伯汝實征之以夾輔周室賜我先君  
履東至于海西至于河南至于穆陵

北至于無棣穆陵即大峴山或以爲  
泰山南龜山北之穆陵

山非也或又以爲光州固始縣南之  
穆陵關不應如是之遠元和志云齊

陳二境置此關以爲防禁隋平陳始  
廢然則南北朝之關塞耳以爲古齊

乎覆可蘇秦曰齊南有泰山東有琅邪



西有清河北有渤海四塞之國地方  
 二千里此其疆域也太公後二十九  
 世疆臣田和篡齊自立五世為秦所  
 滅始皇郡縣天下始置齊郡又析置  
 琅邪沂密秦亡齊分為三齊王田都據  
 臨淄濟北王安據博陽膠東王市據  
 卽墨故號三齊劉貢文云益都為天  
 齊濟南為中齊沂海  
 為南齊非是漢高初假韓信繼封子肥為

齊王有齊七十餘城後置青州刺史  
 部領齊郡北海千乘濟南平原東萊  
 膠東高密淄川郡國凡九而不常所  
 理琅邪東海則為徐州之郡遼東邊  
 郡嘗來屬焉光武十三年以遼東屬  
 青州十四年還屬幽  
 州三國時齊為魏有晉置青州刺史  
 領齊國濟南樂安城陽東萊五郡而  
 理臨淄琅邪東莞亦為徐郡永嘉之

亂青及徐州之半陷于劉曜石勒厥後慕容燕苻秦迭據其地秦敗苻朗以青州降晉改置幽州以辟閭渾爲刺史鎮廣固隆安四年爲慕容德所陷德稱南燕定都廣固二世爲劉裕所滅西濟東海復爲晉土而祚移于劉氏矣劉宋置青冀二州青理臨淄冀理歷城至明帝時二州及琅邪之地竝沒于元魏魏置青濟膠光北徐州宇文周置齊郡樂安北海郡隋開皇初郡廢復爲州大業初州廢復爲北海高密齊郡琅邪東萊五郡唐武德初郡廢爲青齊淄濰牟密登萊沂等州青齊置二總管府後罷總管爲都督府貞觀初罷都督天寶初復爲北海高密濟南淄川東牟東萊琅邪

郡屬河南道青州又升平盧節度石  
 晉青州仍為平盧節度齊密二州則  
 為防禦宋置青密齊沂登萊濰淄八  
 州屬京東東路升青州為鎮海軍密  
 州安化軍齊州興德軍元祐三年安  
 化改臨海軍政和元年鎮海軍復為  
 齊郡六年以齊州為英宗賜履之地  
 升為濟南府建炎元年京東東路青州

為帥府濟南為要郡登萊沂密為次

要郡

從李綱所請京輔之外建十六  
 帥府時天下之勢已去于寶所

謂非命世雄才不能復取  
 網策雖善豈高宗能辦哉

金人初入

中原詭立宋濟南知府劉豫為齊帝

兼八州之地八年廢之置益都濟南

二府立山東東路統軍司于益都轄

十三州焉

濰淄密莒寧海登  
 萊沂海濱棗清滄

國初以濟南益都立二帥府益都仍行

省事後竝廢置益都濟南般陽三路  
總管府割德州寧海爲隸省之州四  
分齊境立宣慰司于益都以鎮之廉  
訪司于濟南以按治之屬山東東西  
道皆古全齊之地也其詳則各隨郡  
縣以載焉其舊屬齊邑今割入他郡  
者亦別附見云

### 分野

地志曰虛危爲齊分野曰玄枵宮曰  
寶斝時曰子州曰青魏陳卓分郡國  
所入宿度齊國入虛六度北海入虛  
九度濟南入危一度樂安入危四度  
東萊入危九度平原入危十一度淄  
川入危十四度魯分徐州屬齊者東  
海入奎一度琅邪入奎六度高密入

婁一度城陽入婁九度膠東入胃一  
度又唐一行山河兩界圖曰河爲北  
河江爲南河自北河下流南距岱山  
爲三齊自南河下流北距岱山爲鄒  
魯皆負海之國貨殖之所阜也觀兩  
河之象與雲漢之所終始而分野可  
知矣春秋運斗樞曰虛危之精流爲  
青州分爲齊國立爲萊山其川淮泗  
其浸沂沭

音述又作沭

其利蒲魚兗之浸

曰盧維幽之浸曰菑澍藪曰豸養

山川

禹貢青州曰嵎夷既略濰淄其道徐  
州曰淮沂其又蒙羽其藝嶧陽孤桐  
皆今齊境山川也取法于經則沂山  
見周禮爲青州之鎮故冠諸山濰淄  
二水青之大川故爲衆水之長次則  
經傳圖志所載與夫古志或遺而高  
大可稱者皆在所書其餘則略祠宇

古迹之類因山川而互見者不復重  
出云

### 益都山

沂山○臨朐縣南百里周禮職方氏青  
州其山鎮曰沂山註曰沂水所出乃  
取名也漢志朱虛縣東泰山汶水所  
出酈道元水經曰大弁山與東泰山  
連麓沐水出焉以二水證之卽公玉

帶

公玉帶濟南人公玉姓帶名  
玉一音肅見史記武帝紀註

請漢

武所封之東泰山也然漢志謂卑小  
不稱其聲者蓋沂山遠望之則高壓  
羣山緣坡麓曼衍八九十里以漸而  
升逮至其顛則失其峻極耳又左思  
齊都賦云神嶽造天惟此山可以當  
之疑亦因東泰山而得嶽名山頂有  
二冢相傳周穆王葬宮嬪於此故大

峴關因號穆陵云按周初封太公已  
有南至穆陵之履豈曰穆妃而得名  
乎蓋二冢不知誰氏之葬反因穆陵  
而附會也山半有唐鎮東安王廟石  
刻神像俗傳趙太祖微時閱韓通于  
此棄衣而石翁媪收之神像猶作臂  
衣之形故又云翁波女廟本卽沂山之  
神歷代封祀有典碑志具存而俚俗  
誕妄如此不經甚矣

大峴山○卽穆陵關也沂山東南曰大  
弁山大弁今人訛作大屏字相類而  
誤唐沈亞之沂水雜記又訛作太平  
山因頂平八九十里故云當從水經  
作大弁者是大弁東南卽大峴也其  
山峻狹僅容一軌故爲齊南天險劉  
裕伐南燕兵過大峴指天而喜曰虜



已入吾掌中卽此山也山北數里有  
裕祭天五壇

仰天山○臨朐南七十里有黑龍洞縣  
邑禱雨輒應宋碑云元苻三年敕額  
靈澤廟崇寧五年封濟侯

逢山○臨朐西十里按路史逢伯陵姜  
姓炎帝後太姜所出始封于逢在開  
封逢澤後改封于齊猶稱逢公山因

名焉有逢公祠漢志云祠逢山石社  
石鼓於臨朐山舊有石鼓或擊而有  
聲則齊亂今不存矣其山四面斗絕  
惟一徑可登且有泉金末避兵于此  
者多獲免

靈山○臨朐東北廿里晏子春秋云齊  
大旱景公曰卜崇在高山廣澤寡人  
欲祀靈山可乎晏子曰靈山以石爲

身草木爲毛髮天久不雨髮將焦枯  
身將藝獨不欲雨乎祀之何益蓋此  
山也

丸山○臨朐東北三十里大紀云軒轅  
踐位天下有不道者從而征之凡五  
十三征而奄有中區東至于海登丸  
山及岱宗西至崆峒登雞頭南至于  
江登熊湘北逐葷粥合符釜山竹書

云堯放丹朱於丹水朱虛縣有丹山  
一名丸山黃帝所禪又名堯山下帶  
長阪曰破車峴東西二丹水出焉此  
山西接靈山東連方山遙見穹崇近  
則卑小豈上古之時爲瀕海之山後  
漸去海遠耳俗名丸山蓋丸字訛也  
雲門山○府城南五里上方號大雲頂  
有通穴如門可容百餘人遠望如懸

鏡泉極甘冽崖壁上銜蚌殼結石相傳海田所變如沈存中筆談載太行山崖螺蚌石子橫亘如帶之類齊地尤多又有碎石子或間瓦礫凝結作石殆不可曉蓋蚌石雜沙土凝者水所漬也石子自凝成石者氣所化也豈天地之終萬物皆碎爲塵及其開闢漸復凝聚元氣查滓中融化未盡者猶有其質邪以理逆之無足怪者雲門之東曰劈山山峯分裂如劈古名劈頭山西則駝山三山聯翠障城如畫宋熙寧間知青州盧士宗山路記云營丘東秦舊服周環衆山雲門爲之冠然此山實不聞于天下其磨崖題刻有宋慶曆八年富文忠公題名七人熙寧二年歐陽文忠公六人

四年趙清獻公二人吳文肅公奎十  
一人政和五年安撫使梁子美十七  
人金泰和間亦有益都少尹夾谷璋  
十一人然則雲門絕景前賢題品尚  
矣圖經散逸之後乃不得與龍山虎  
丘角雄天下爲可惜也故特表而出  
之云

堯山○三齊略云在廣固城西十里堯  
巡狩所登遂以爲名山頂有祠祠邊  
有栢樹枯而復生不知年代此山正  
臨廣固廢城才二三里去今府城乃  
十里耳唐開元三年青州刺史王昕  
碑亦云堯山者齊記謂堯巡狩所登  
大曆八年平盧淄青節度使李正己  
碑云魏神龜三年青州牧臣沐載建  
祠及李乾暉碑陰疏棟宇甚盛今皆

不存中統初益都同知劉仁傑始立  
廟設像紀石又有宋熙寧小碣凡五  
碑余按堯狩此山殊不經見府東角  
崩山與方山相連伏琛齊記亦名堯  
山水名堯水地名堯溝以堯名者不  
一鄭康成云堯遊城陽而死葬焉大  
紀云堯葬城陽丘壠小葬具微前志  
謂濟陰成陽有堯冢然齊有丹山朱  
虛丹朱所封而齊之城陽比濟陰尤  
顯豈堯老而遊者齊莒之城陽歟丘  
壠微小不存而山川猶表其稱歟  
嶼山○府城東五十里水經云康浪水  
出嶼山堯水逕嶼山東山在劇縣西  
南無事樹木圓峭孤特左思賦嶼鎮  
其左是也按齊城山勢俱帶西南東  
郊平原百餘里有香山者童然孤峙

康浪發其南堯水逕其東卽嶼山也  
 元和志作箕山紀侯冢在山陰宋書  
 云焦恭祭冢得玉磴焉金見巨洋水  
 條下山西南十里有龍女泉辛酉夏  
 旱欽禱此泉投文水中卽日雨露足  
 明年復禱亦如之嘗率村氓欲碑其  
 事昨諾而不集因附此以垂不朽云  
 牛山○臨淄南十里孟子曰牛山之木

嘗美矣齊景公登牛山北顧其國而  
 流涕爲晏子所笑卽此山也又白淵  
 之齊道記曰黃丘北十里有鸞鷲峴  
 下帶長澗東北流經牛山山去此水  
 八十餘里號曰牛頭水是齊景公所  
 登而歎處蓋言爲山濁水耳

嶽山○臨淄南十五里齊風曰子之還  
 兮遭我乎嶽之間兮卽此山也漢書

作嶲亦作夔與猛通

稷山○臨淄西南十三里隋志曰臨淄有稷山齊記補曰山舊有后稷祠故名又齊宣王嘗立孔子廟亦名孔父山也

愚山○臨淄西二十里桑欽云山東有愚公冢山北有愚公谷按韓非子云桓公逐鹿入谷問一老父此何名愚

公谷對曰臣畜犗牛生犢賣之而買駒少年謂牛不能生馬遂持駒去傍鄰聞之以臣爲愚故名愚公谷後人因爲立廟宋元豐間禱澍有感封隱利侯南曰杜山與愚山連阜水經云時水屈而西南有杜山高士傳齊宣王獵於杜山閭丘先生長老十三人相與勞王王賜父老不租父老皆謝

先生獨不拜復賜無徭役又不拜曰  
望得壽富貴於王王曰死生有命非  
寡人也倉廩備災無以富先生大官  
無闕無以貴先生閭丘曰非也選良  
吏平法度臣得壽矣賑之以時臣得  
富矣令少敬長臣得貴矣山有白龍  
灣神祠宋政和賜額顯貺

商山○臨淄西三十里今隸高苑齊記

補云南燕建平三年立冶逮今鼓鑄  
不絕崔琰述征賦云涉淄水過相都  
登鐵山望齊密卽此山也寰宇記以  
爲密州之鐵山者非是

孤山○濰州西四十里有穴曰龍洞禱  
焉雲出卽雨宋封山神曰廣靈侯又  
以孟子言伯夷避紂居此北海之濱  
因立廟封伯夷清惠侯叔齊仁惠侯



崇寧大觀碑刻存焉

國朝至元十八年加封山神曰孚澤廣

靈侯伯夷昭義清惠公叔齊崇讓仁

惠公

路史伯夷名允字公信叔齊名致字公遠夷齊謚也此說恐未

必然山東曰麓臺俗傳公孫弘讀書處

元和志以為弘墓

陸山○昌邑縣南四十里濰水東岸漢

封霍光為博陸侯食邑北海河東師

古曰蓋鄉聚之名非縣也此博陸聚

之山耳故名陸山天寶六年敕改霍

侯山南有岵山又南峽山皆瀕濰水

浮來山○莒州西三十里春秋公及莒

人盟于浮來即此也俗訛作浮丘山

山半有莒子陵又東南馬鬣山又東

屋漏山浮來之北則洛山黃華水發

源于此合浮來衆水瀦為莒之西湖

湖西復有定林山山有定林寺亦名刹也

焦原山○莒州南四十里記云莒有焦原臨百仞之溪人莫敢近莒勇士登焉莊子伯昏瞿人射臨百仞之淵卽此漢志謂之崢嶸谷俗曰青泥衝兩峽峻立如衝故云

雹山○沂水縣西北三十里寰宇記山

出紫石英好者映徹如雹故名亦作咆山今曰咆突固又東北螳螂山與大小二魯山相連有穴如門直入二十里真仙境也縣西四十里有磨石峴長二十餘里極險峻峴下卽堂阜鮑叔解管仲囚處俗訛作憚阜

高柘山○沂水東北百里漢志靈門有高柘山澹水所出東入濰又名巨平

山俗曰臺頭山

望仙山○沂水西南百里縣中有望仙

橋以為王喬飛鳥之地未詳

按列仙傳仙人

王喬同姓名者有三人次笙王子晉一名王喬在周飛鳥王喬在葉縣食

肉芝王喬在益州北平山在齊地琅邪者無之俗附會耳

蒙陰山○蒙陰縣南八里今名仙洞山

琅邪承宮避亂此山立性好仁不與

物競人有認其禾者舍之而去

龜蒙二山○魯頌閼宮曰奄有龜蒙遂

荒大東傳曰龜蒙魯國二山也龜山

近魯在今費縣西北七十里後人指

為蒙山者山頂宛如龜形名不虛得

夫子龜山操曰余欲望魯兮龜山蔽

之韓退之擬曰龜之大兮祗以奄魯

則龜為魯之大山明矣蒙山者在龜

山東二山連屬長八十里禹貢之蒙

羽論語之東蒙此正蒙山也邢昺曰  
先王封顓臾爲附庸之君使主祭蒙  
山蒙山在東故曰東蒙後人疑於東  
蒙之說遂誤以龜山當蒙山蒙山爲  
東蒙而隱沒龜山之本名夫魯人頌  
其本國之山川辭必審矣故今定蒙  
山爲龜山東蒙爲蒙山以復古焉帝  
世紀少昊自窮桑都曲阜註謂窮桑  
在東蒙山屬魯地然未知果是否

龜山下有古顓臾城山前玉虛宮唐

仙人賈神翁所建有英烈昭濟惠民

王祠卽顓臾也山西南十餘里有漏

澤澤有五穴春夏積水秋冬漏竭將

漏之時先有聲居人扈穴取魚隨種

麥比水至麥已收矣費縣解有唐大  
中間校書郎李

潛漏澤賦并序石刻宋至和間出於  
泥中今斷裂爲二在醉翁亭記碑傍

醉翁碑者歐公同時人蘇唐卿爲費  
縣宰篆記文刻石立於此并刻歐公

往復手帖皆精蒙山前陽口村有玉皇廟相

傳老萊子故宅也陽口亦山名後魏

費縣理此高士傳老萊子隱蒙山著

書十五篇言道家用楚王嘗至其

門其妻挾薪而至怪車馬跡之多曰

可食以酒肉者可加以鞭捶可受以

官祿者可隨以鈇鉞先生受人官祿

為人所制妾不能為人所制也夫婦

遂相與逃去路文又云老萊子即老

也子至楚見其來子時已二百餘

衣戲母劍前問答書也事無非

知是正  
翠山地記舊在臨沂縣西北九十里

今屬沂州東南自二十里殛鱗山也

前有羽潭一名羽池左傳鱗化為黃

龍入于羽淵即此淵傍生細柳野獸

不敢踐郡國志又云鍾離昧城南有

羽泉亦經鯨處其水恒清牛羊不飲  
艾山○左傳隱六年公會齊侯盟于艾  
杜註泰山牟縣東南有艾山在今沂  
州城西三十里與大小鳳凰山相近  
官溝水自小沂分流經艾山西注山  
前靈鎮侯廟山東漢厚丘縣古城城  
西有酺神廟詳見祠宇

君山○一名抱犢山嶧州北六十里述

征記曰承縣君山有抱犢固壁立千  
仞去海三百里天氣澄明宛然在目  
山上有池深纔數尺水旱不增減平  
田數頃昔有隱者王老抱一犢於上  
耕種後遇異人仙去故以名焉漢曰  
樓山魏號仙臺其高九里周四十五  
里然今嶧州城北三里別有仙壇山  
亦奇秀豈卽仙臺而誤爲君山所掩

邪

魯卿山○嶧州東北七十里國語季文子相宣成二君妾不衣帛馬不食粟魯人思其遺惠爲之立廟亦名季山俗作神峯山

夾山○嶧州北七十里通典東海懷仁縣有夾山春秋之夾谷也左傳定十年公會齊侯于祝其實夾谷孔子相漢有祝其縣

禹貢別州以山川定經界秦漢以降建置雖不常亦不敢失山川之限焉按抱犢魯卿諸山古圖經皆屬嶧州今則竝屬沂州訪之者舊云李壇據齊以其姻親胡某者知沂州實張威福嶧州畏其逼盡割州東二十里外境與之逮今不改嗚呼壇賊據彈丸

之地爲政不平如此固不足責職方  
氏因之豈矇不知邪

尼丘山○滕州鄒縣東北六十里有坤  
靈洞宣聖廟其東顏母山水經謂之  
防山防墓崩卽此有顏母廟南有昌  
平山夫子所生之鄉又南馬鞍山有  
孟母墓又南唐口山有孟子墓

鳧山○鄒縣西南五十里闕宮曰保有  
鳧嶧遂荒徐宅傳曰鳧嶧二山名也  
古有伏羲廟今云有伏羲墓按左傳  
顓臾風姓伏羲之後實司太昊之祀  
鄒魯有廟是也伏羲都陳有墓非也  
今訛作爺娘山

嶧山○鄒縣東南二十里京相璠曰嶧  
山在鄒縣繹邑之所依山東西二十  
里高秀獨出積石相臨殆無土壤石



間孔穴洞達相通有如數間屋者俗謂之嶧孔避亂入嶧外寇雖衆無所施害永嘉之亂太尉郗鑒將鄉曲千餘家逃此今山南有大嶧名郗公嶧亦有古城遺跡史記始皇二十八年東行郡縣上鄒嶧山刻石頌德三代地理書曰始皇乘羊車登嶧山刻石處名曰書門

桃山○滕州南五十里御覽云卽華采山也又名義珠山山上有井不可窺窺者不盈歲輒死有鳥巢井上金喙黑色見則大水今訛作陶山謂有陶朱墓西微山謂有微子墓皆謬惟奚公山奚仲造車處上山軌轍猶存見地記云

牟婁山○密州安丘南二十里路史云

古有巢氏治石樓山卽牟婁也本牟夷國密之諸城有婁鄉隋因置牟山縣今訛作朦朧按字書云牟婁微視也義或緣此

常山○密州南二十里東坡雩泉記曰禱雨未嘗不應蓋有常德者故謂之常山廟西南十餘步有泉古者謂吁嗟而求雨曰雩名之曰雩泉宣和間

封山神靈濟昭應王

盧山○密州東南四十五里東坡詩註盧敖秦博士避難此山遂得道有盧敖洞飲酒臺聖燈巖障日峯三泉馬耳山○密州西南六十里東坡詩試掃北臺看馬耳未隨埋沒有雙尖

北臺

謂超然臺也

九仙山○密州東南百二十里坡云九

仙在東武奇秀不減鴈蕩所謂九仙

今已壓京東是也

漢琅邪郡有太一仙人祠九所豈以

此得名邪

琅邪山○密州東南百五十里齊景公

放於琅邪卽此吳越春秋越王句踐

徙琅邪立觀臺以望東海秦始皇廿

八年南登琅邪大樂之留三月徙黔

首三萬戶于臺下立石頌德御覽云

碑有六百字可讀臺側有四時祠臺

上有神泉人或汚之卽竭漢於此置

琅邪縣武帝亦嘗登焉隋開皇十六

年於此置豐泉縣大業初復爲琅邪

唐省之今山下井邑遺跡猶存登山

石道如故土人名曰御路

大朱山○膠州西南百二十里岸海名

山也通典高密諸城縣有古齊長城

自大朱山起蓋古齊長城起自齊西  
防門東逾泰山穆陵至大朱山海濱  
而絕非起自大朱也大朱山有石室  
晉永嘉中陳仲舉隱此得道仙去旁  
有小朱山錯水所出又東徐山方士  
徐福將童男女二千人會此入海采  
藥不返又東白貌山風水所出錯水  
俱東  
入海

大小二勞山○卽墨東南六十里岸海  
名山也又名勞盛山四極明科云軒  
皇一登勞盛山是也齊記云泰山自  
言高不如東海勞吳王夫差登之得  
靈寶度人經神仙傳樂子長遇仙人  
授以巨勝赤散方曰蛇服此藥化爲  
龍人服此藥老成童子長服之年百  
八十歲顏如少女登勞山仙去山高

十五里周八十里此大勞也與小勞

山華樓山

疑卽陰山

鼎足相聯大勞山有

上清宮五代末華蓋仙人識趙太祖

于側徵宋人爲建此宮近世有劉使

臣者棄金符遜此山其徒建碧落宮

陰山○卽墨東南八十里上有小池深

不盈尺水旱不增減池傍有石人并

石馬蹄迹寰宇記云秦始皇至牢盛

山望蓬萊立馬此山遣石人驅牢山

不動因立於此石人今海濱山上往

往有之

蓋勞山之高以其登陟之難則名勞驅之不動又名牢也

不期山○卽墨東南四十里又名訓虎

山後漢童恢爲不期令有虎食人恢

檻獲二虎訓之曰王法殺人者死虎

敢食人一虎垂頭服罪一虎吼躍不

服服者殺之躍者縱之三齊記云鄭

玄教授此山草生如薤長尺餘堅韌  
異常號康成書帶余按勞山不期皆  
康成講學之地文澤涵濡草木爲之  
秀異千載之下第茅塞焉深可歎已  
天井山○卽墨東十餘里上有一井極  
甘因號天井北二十餘里平地三穴  
湯泉出焉若有風從西北來則湯極  
熱不可入

女姑山○卽墨西南三十里山北舊有  
基漢志不期太一仙人祠九所及明  
堂武帝所起不期城西南有七神號  
曰女姑卽此又東有中祠山亦九祠  
之一又天室山亦祠所竝見寰宇記  
田橫島○卽墨東北百里橫衆五百人  
死此四面環海去岸二十五里可居  
千餘處蓋有竹島塔沙福島穀積車

牛皆海中島名然登州蓬萊閣西復  
有田橫島在岸不在水非是

### 寧海山

大崑崙山○州東南四十里嶠夷岸海  
名山也秀拔爲羣山之冠仙經云姑  
餘山麻姑於此修道上昇餘趾猶存  
因名姑餘後世以姑餘崑崙聲相類  
而訛爲崑崙然今東夷人止名崑崙

又有小崑崙崙與之相連宋政和六年  
封仙姑虛妙真人重和元年賜號顯  
異觀元遺山續夷堅志崑崙山石落  
村劉氏嘗於海濱得百丈巨魚取骨  
爲梁構屋曰鯉堂堂前一槐蔭蔽數  
畝忽夢女冠自稱麻姑乞此樹修廟  
劉漫許之後數日風雷大作昏晦如  
夜失槐所在相與求之麻姑廟中樹

已臥廟前矣山有東牟侯神祠又金  
大定間關西王祖師訪山前大姓于  
氏曰我前生修煉此山山有烟霞洞  
盍往登焉于氏以爲我世居此未聞  
有洞相與登山求之果見洞口有烟  
霞字跡大爲神異建祠紀石焉

盧山○州東二十里與大峴山東牟山  
相連北至海百里有望海臺峴山  
有東牟侯祠又東繫馬山始皇於此  
繫馬草生猶作繫結之狀俗云繫馬  
砮州西南六十里兩欵山兩峯欵側  
相倚竝見寰宇記

文登山○文登縣東二里寰宇記始皇  
東巡召集文人登此山論功頌德故  
名又東有鷓鴣山常有鷓鴣栖其上  
斥山○文登東南六十里爾雅云東北



之美有斥山之文皮焉蓋以海濱廣  
斥得名高門之族居此有千餘家東  
齊于氏皆斥山望也欽之曾大父端  
叔府君自斥山徙昌陽大父君瑞府  
君其仲子也又自昌陽徙益都先考  
禮部公嘗命欽攷斥山于氏所出欽  
對曰按氏族略于氏本周武王子邗  
叔所封之國在河內邗城子孫以國

爲氏去邑爲于後魏時有自東海隨

拓拔徙代改爲萬紐于孝文復爲于

氏又有淳于姜姓之後唐避憲宗嫌

名亦爲于氏此鄭氏之說也然史記

文王伐邗在野王縣西北書大傳正作于于

蓋古諸侯之國非始於邗叔也又夏

相時于夷來賓子欲居九夷于夷其

一也或卽嶠夷之轉或于國之裔有

奔海濱而君長東夷者何其族之蕃  
而世之衍也斥山之于祖此爲的先  
君頷之

之朶山○州西北五十里海濱史記秦  
始皇廿九年登之朶刊石紀功三十  
七年又自琅邪使徐福采藥福言苦  
大魚爲患於是連舟下海登之朶射  
巨魚郊祀志齊有八祠之朶爲陽主

山有陽主廟武帝太始三年幸琅邪  
禮曰成山登之朶稱萬歲子虛賦又  
云射乎之朶其山入海中有壘石相  
傳武帝造橋兩石銘猶存山高九里  
周五十里西南至福山縣長三十餘  
里

召石山○文登之東三齊略云始皇造  
石橋渡海觀日出處有神人召石下

城陽一十山岌岌相隨而行石云不  
駛神人鞭之見血今召石山石色皆  
赤伏琛齊記曰始皇造橋觀日海神  
爲之驅石豎柱始皇感其惠求與相  
見神曰我醜莫圖我形當與帝會始  
皇從橋入海四十里與神相見左右  
有巧者潛以足畫神形神怒曰帝負  
約可遠去始皇轉馬前脚纔立後脚  
隨崩僅得登岸今驗成山東入海道  
水中有豎石徃徃相望似橋柱之狀  
又有柱石二乍出乍沒琛云始皇渡  
海立此石標之以爲記山下有海神  
廟望海臺始皇廟

成山○文登東北百五十里古不夜城  
側漢志亦作盛山主祠曰盛山斗入  
海最居齊東北陽以迎日出武帝太

始三年幸東海作朱鴈之歌禮曰此  
山還而下卹鰥寡今按召石與成山  
相近因始皇會海神故後世遂呼成  
山曰神山山斗入海旁多椒島海艘  
經此失風多覆海道極險處也

鐵官山○文登西百四十里去牟平城  
百里漢置鐵官冶鑄遺跡尚存

五壘山○文登南五十里南北成行入  
海如壘又南石門山兩石聳立如門  
今按文登正南有鐵查山東連斥山  
甚奇秀圖經弗載豈古與斥山爲一  
或卽五壘石門之異稱歟

白鹿山○文登北四十里唐神龍三年  
刺史畢元愷於此獲白鹿進之故名  
又東北海邊有雞鳴島北海中有海  
牛島郡國志云海牛無角長丈餘紫

色足似龜尾若鮎魚性捷疾見人則  
飛赴水皮堪弓鞣脂可然燈與海驢  
島相近海驢常以八九月上島產乳  
其皮水不能潤可以禦雨竝見寰宇  
記海驢皮今有獲之者淺毛灰白作  
鱸魚斑又有海狸亦上牛島產乳見  
齊記

昌山○文登西南四十里有巨神龍龍  
祠昌水出北山因氏焉南合黑水北  
納昌陽湯通名昌水西南過萊陽會  
五龍水南入于海昌陽湯極清温在  
文登西七里名如意湯圖記文登有  
温泉七所此爲最

般陽山

九目山○登州東南七十里齊記云山  
有九竅故名北二十里有龍山又北

羽山之杲水所出東北流合石門水  
入海寰宇記亦謂此爲殛鯨之山非  
也東海既有羽山鯨廟矣此偶同名  
耳又有朱高密神隱丘歷堂等山圖  
志弗載不可備述

沙門島

海市附

○登州北海中九十里上

置巡檢司海艘南來轉帆入渤海者  
皆望此島以爲表誌其相聯屬則有

鼉磯島牽牛島大竹島小竹島歷歷

海中蒼秀如畫海市現滅常在五島

之上海市之名始見江鄰幾雜志東

坡詩序或謂類南海蜃樓蛟蜃噓氣

所成殆不然欽嘗至登州海上訪之

蓋海市常以春夏晴和之時杲日初

升東風微作雲脚齊敷于海島之上

海市必現現則山林城闕樓觀旌幢

羶車駝馬衣冠人物凡世間所有象  
類萬殊或小或大或斲或久或變現  
終日或際海皆滿其爲靈怪赫奕豈  
蜃樓可擬哉蓋滄溟與元氣呼吸神  
龍變化浩不可測如佛經所謂龍王  
能興種種雷電雲雨居於本宮不動  
不搖山海幽深容有此理欽以中秋  
後至海濱天已微寒知州事李述之  
詩人也亦相與禱于廣德王之祠越  
二日忽報云今晨風色雲氣海市當  
現同登賓日樓候之日初出大竹島  
上橫一巨艘長餘百尋述之指以示  
余余曰此海舟耳述之曰諦觀之何  
故不動須臾前後曳數旗劔戟紛紜  
忽不見惟有空舟漸變如長廊而滅  
述之曰風稍急而寒不然現未已也

嗚呼神哉然則史漢所稱三神山蓬萊方丈瀛洲望之如雲未能至者殆此類耳且秦漢入海方士僅能往來於磯島之間偶見此異慕之爲仙亦不爲過非若今人航海遠泛黑水洋外或飄蕩歲月而後返果有蓬萊仙山何不聞也斯言足破千古之惑矣金山○亦名岨嵎山棲霞縣東北二十

里以產金得名卽地記萊陽縣之黃銀坑也隋開皇十八年牟州刺史辛公義於此坑冶鑄得黃銀獻之山寺有隋碑淘金者所祖然隋唐以來皆守土官采以充貢爲數不多未見其害今則編戶置官歲定金額有增無減三時沙汰僅得分毫名曰淘金實則買金鑄納戶漸逃亾官復侵剥大



約金戶一家之賦當他戶三倍之多而戶不勝其苦矣又指以金苗鑿地人家居宅墳壠皆所不免而民不勝擾矣其害視醯竈有加夫弘羊之罪良史已書辛公義作備此毒可無誅乎故論及之土俗訛傳隋開皇中岨嵎山出黃金九屋俗儒便紀之于石為可笑也

艾山○棲霞西北三十里山前溫泉可

浴按棲霞縣本以山得名曰百澗北

曲方嶺唐山靈峯覆甌積金芝陽公

山棊山磁山哈壚山哈壚在福山縣南不能

具述大抵環縣皆山耳宋李常云吾

州有重巖疊嶂不可名狀信然

萊山○黃縣西南五十里封禪書云齊

八祠萊山為月主山有月主真君祠

一云萊陰山多仙聖所居

蹲狗山○黃縣西南三十里上有石如狗蹲伏氏云山極靈劉寵微時途經此石犬吠之後爲太尉俗名狗兒山蘆山○黃縣南四十里山下有真君宮金縣尹陳公碑云蘆童子晉時人九歲居此山食茯苓升仙唐封沖禧真君

三山○萊州北二十里漢志秦祠八神四曰陰主祠三山寰宇記云在掖縣北海之南岸顏監謂卽三神山者非也漢志曰蓬萊方丈瀛洲此三神山者其傳在渤海中則三神乃蓬萊方丈瀛洲之總稱豈海岸之三山也詳見海市論

浮游島○萊州北海中望若浮游然俗

訛曰芙蓉

福祿山○萊州西五里出温石可爲器  
又有金山馬鞍優游雄山土山君山  
皆縣境內

萬里沙○萊州北三十里夾萬歲水兩  
岸沙長三百里路史云雲陽氏陽帝  
處于沙掖有萬里沙祠秦皇漢武皆  
禱于此又北十餘里臨海有盞石方  
圓五步上有窪樽古老相傳始皇繫  
此盛酒以祭百神

大基山○萊州東十里金明昌間劉國  
樞記云大基山道士谷後魏鄭文公  
得道之地流泉花竹地占高敞略無  
纖塵郡之甲勝

七子山○萊陽縣東南九十里山有八  
峯大峯居中餘若子然故曰七子

五龍山○萊陽南二十里四水自西北  
昌水自東北皆南流至山前五水相  
合名曰五龍南入于海山因名焉西  
有荆山寰宇記作萑山爾雅霍山萑  
者是也

高麗山○萊陽西南九十里司馬懿征  
遼東置戍於此以高麗爲名俗訛作  
差我山

火山○萊陽北三十里山多赤石故以  
火名已上竝見寰宇記又有倉山林

寺福阜三山

林寺福阜  
淘金之地

又有獅子峯

俗傳金人詩俚甚今不取

大豁山○膠水縣西北二十里伏琛云  
虞鄉城東南有豁口曰大豁山北又  
有小豁山

嶺呀山○膠水北三十里寰宇記云川

形嶮岬故名北與蹲狗山相接天柱  
大澤皆一帶山也

明堂山○膠水東北四十餘里齊記云  
盧鄉城東三十里有明堂山與巨青  
山連出烏頭天雄又云藥石水出此  
合石瀆才北入于海

墨山○膠水東北六十里石色如墨故  
名水出茲山亦名墨水

金泉山○膠水東南四十里記云出桔  
梗防風

鳳喙山○招遠縣北三十里本名牛心  
至元六年陳節齋按部過之以其名  
俚故易之有詩石刻在縣治縣北五  
里有湯泉阜泉出阜南極熱東流合  
冷泉入池始可浴鳳喙山東有山中  
空俗曰虛空山又有齊山望兒亦皆

鄙俚自圖經散逸齊地山川例蒙俗  
惡之稱惟密州境內一山一水各存  
古雅蓋得坡仙手滌凡陋千載有光  
信賢人之澤遠矣

梓桐山○般陽府城東十餘里後有石

壘園洞古老相傳鬼谷子隱居名鬼

谷洞

典路鬼谷弟子蘇秦張儀輩五百餘人鬼谷為作窟深二丈曰有能在窟中說使泣者則能分人主之地矣秦下說之鬼谷泣下卽此洞

亦有鄭康成廟余末燬于兵也卯歲

淄川令張孚重修池水燕談云處士

王樵隱此山詳見人物論梓榭東曰

吉磨山出磨石有石碌井

原山○府東南七十里地志云原山淄

水所出今名岳陽山淄出其陰汶出

其陽非止一水也山亦跨淄川益都

兩縣界云

甲山○府西南三十里水經註萌水出  
般陽西南甲山東北入瀧水今訛作  
夾谷山謂是齊魯會盟之地非也當  
從水經

黌山○府北十里三齊略云鄭玄刊註  
詩書棲遲此山上有古井獨生細草  
葉似薤俗謂鄭公書帶卽今黌堂嶺  
與長白山相連元遺山濟南行記謂

因范文正公學舍在焉故謂之黌堂  
蓋未見古圖經耳

長白山○長山縣南三十里太平御覽  
云長白山者因此山雲雨長白故名  
之西南又有大湖山二山竝有石室  
敗漆船上有記皆謂堯時物元和志  
云於陵城西長白山高二千九百丈  
周六十里昔陳仲子夫妻隱此山阿

有醴泉寺相傳志公卓錫之地宋范  
 文正公讀書寺中日惟一粥偶見窖  
 銀覆之而不取後為西帥僧人求為  
 修寺公使發之取窖中銀適周於用  
 此與還術者子白銀相類世或未之  
 聞也上下二書堂在巖堂嶺會仙峯  
 下皆宋代所建遺跡尚存今即寺內  
 有范公祠舊說公母嫁齊居秋口公  
 讀書此山相去百里往來省親劬甚  
 後知青州悲思不自勝秋口在今顏  
 神鎮土人亦名其處為范公書堂按  
 南岱東沂山小秦之外沂之蒙山密之  
 九仙即墨之大小勞寧海之姑餘般  
 陽之長白皆三齊高大名山也餘不  
 得竝列

濟南山



歷山○府南五里一名舜耕山古有舜祠曾南豐齊二堂記云舜耕歷山漁雷澤陶河濱作什器於壽丘就時於負夏鄭康成釋歷山在河東雷澤在濟陰負夏在衛地皇甫謐釋壽丘在魯東門之北河濱在濟陰定陶西南陶立亭是也以余考之耕稼陶漁皆舜之初宜同時則其地不宜相遠孟子又謂舜東夷之人二家所釋雷澤河濱壽丘負夏皆在魯衛之間東方之地歷山不宜獨在河東在齊者是也世因河東雷首山一號歷山瀉水所出舜娶堯女所居遷就附益謂歷山爲雷首之別號不考其實由是言之則圖記皆謂齊之南山爲歷山舜所耕處故其城名歷城爲信然也或

者不此之論乃備載陸魯望象耕鳥

耘之辯可見其贅龜蒙曰世謂舜田歷山象為之耕鳥

為之耘聖德感召非也蓋耕者行端而履深似象步耘者舉疾而畏晚如

鳥通典云山有太甲冢未詳歷山南

屬泰山東連琅邪崇岡疊嶂脊脈不

斷欽嘗有詩云濟南山水天下無晴

雲曉日開畫圖羣山尾岱東走音奏海

鵲華落星青照湖此濟南山勢也

廟山○府城東南十里三齊記云因舜

廟得名遺山濟南行記作妙山非是

函山○府南二十里按酉陽雜俎云齊

郡函山有鳥名王母使者漢武登此

山得玉函帝下山玉函化為白鳥飛

去世傳山上有王母藥函鳥常守之

因號函山有九十谷又名臥佛山

奎山○府城西南十五里三齊記奎山

公神似猪頭戴珠冠殷時有道士隱  
此野火四發道士祈天卽雨今人遇  
旱燒山禱雨多應又北有匡山世傳  
太白讀書于此又北曰栗山曰藥山  
山出陽起石極佳故名

華不注山○府東北十五里左傳成公  
二年魯季孫行父帥師會晉郤克及  
齊頃公戰于鞞齊師敗績逐之三周

華不注又云從齊師至于靡笄之下  
逢丑父與公易位使公下如華泉取  
飲則此山亦名靡笄靡與地記又名

金輿道元謂單枕秀澤不連陵以自  
高虎牙傑立孤峯特拔以刺天青崖  
翠發望同點黛信然山前道院中有  
石刻太白諸賢詩院前卽華泉水與  
小清合流

鵲山○府北二十里王繪太白詩註云

扁鵲煉丹於此俗又謂每歲七八月

烏鵲翔集故名按扁鵲盧人近在今

長清縣地煉丹此山者是古有鵲山院見陳後

詩山

黃山○府西南六十里山周如城岱陰諸谷之水奔流至山西匯為池圍數畝不溢而伏山即渴馬崖也伏流至

府城之西而出即趵突泉也

西龍洞山○府南六十里道元云符秦

時有竺僧朗事佛圖澄碩學淵通與

隱士張巨和居此因號朗公谷今有

朗公寺亦三齊名刹歷代有碑谷有

琨孺溪水過玉符山又名玉水至祝

柯入濟今溪水東西分流山中入云

西發趵突東發百脈驗之信然謂徑

入濟者誤也龍洞西南有方山

長清縣界

疑卽水經之玉符山又西隔馬山

長清

東左傳襄公十八年晉伐齊齊侯禦

諸平陰漸防門而守之廣里齊師懼

夜遁夙沙衛連大車以塞隧而殿殖

綽郭最曰子殿國師齊之辱也子姑

先乎乃代之殿衛怨二子遂殺馬於

隘以塞道欲使晉師得之卽此後人

呼爲隔馬山山東北曰神林有隔馬

神君祠祠南有一潭清澈見毫髮歲

旱邑人祈聖水禱雨輒應唐宋碑刻

存焉又南青崖山金亂巖侯率義兵

堡此皆古齊山今屬泰安

東龍洞山○府東南三十里山如重甌

音言甌也爾雅重甌隙此山類之

西洞透深一里許

秉火可入東洞在萬仞絕壁之上洞

日釜鬲尚存煙火之跡如墨蓋昔人  
避兵引絙以上中必有泉不知其深  
幾許耳有翠屏巖獨秀峯三秀峯峯  
側龍祠郡邑禱雨極應宋封靈虛公  
九域志又云禹登山謂禹治水嘗登  
龍盤山○章丘縣南二十八里齊記云  
周初有神龍潛此山遂名有神跡祠  
姜嫄所履伏琛云宋濟南太守蕭承  
之立祠山上其妻亦學履而產齊帝  
按姜嫄炎帝後有駘氏之女高辛世  
妃后稷母也駘舜封稷作郃元和志  
郃在京兆武功縣路史駘在費縣南  
遠者去此數千里近亦五百餘里姜  
嫄未嫁不應至此旣嫁則高辛都亳  
河南偃師地豈在齊乎伏琛之論尤  
覺誕妄

樂盤山○章丘南二十七里齊記云下有樂盤城卽平陵王與章丘侯餞送之地

東陵山○章丘南二十八里龍盤山相連寰宇記云盜跖死處山南有盜跖冢

危山○章丘東北五里寰宇記云漢文帝十六年封齊悼惠王子爲齊孝王景帝三年孝王與吳楚通謀自殺葬於此墓在山椒

女郎山○章丘東南七里又號小田山齊記云章亥有三女溺死葬此有三陽洞俗云有子張墓卽章女冢所謂章丘者耳

雞山○章丘西南四十里齊記云有神雞晨鳴于此候之獲一石潔白如玉

因以名焉巨合木出此山下俗名雙  
女泉

湖山○章丘正南五十里明秀鄉相傳  
古有仙翁仙婆修道此山皆得壽考  
今有公婆廟遇旱禱雨卽應

亭山○章丘西南六十里桀死處湯放  
桀于南巢書傳皆謂今廬江巢縣獨  
一其子云放之歷山豈古有巢氏治琅

邪之石婁山齊地亦有南巢邪又桀  
死後其子淳維妻其衆妾遁于北野  
隨畜轉徙號曰葷育若桀死南方其  
子豈能北遁自齊奔漠則易矣隋唐  
有亭山縣峴古蹟

啞婦山○鄒平縣西十三里俗呼啞婦  
山謂天子去齊道此山婦人陽瘖以  
滅跡蓋因孔子去魯之歌曰彼婦之



口可以出走而附會此名直野語耳  
大山○無棣縣東北八十里

小山○無棣西北一百二十里二山圖

經弗載然濱棣瀕海廣斥無高峻之

山故志

平原嶺○德州東南七十里有望遠臺

壽公菴嶺上鹿角關

齊乘卷之一

